

Date –25/09/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Chief Minister Pu Lalduhoman Mizoram State Human Rights Commission Chairperson leh member-te a kawm.
2. Home Minister Pu K. Sapdanga'n tunhnaiah College leh High school zirlai zingah ruihhlova inhnamhnawih an awm nual thu an dawng a ti..
3. Prime Minister Narendra Modia chuan vawiin khan Seva Yatri te nen inkawmin midang rawngbawlsak chu dam chhan ber leh mitin nuna awm tur a ni a ti.
4. North East Regional Muaythai Championship 2026 ah a pumpuia Pakhatna - Mizoram Team an ni.

<><><>

CM

Chief Minister Pu Lalduhoma chuan a office-ah Mizoram State Human Rights Commission Chairperson leh member-te a kawm a.

Chief Minister hian lawmpuina leh an kal zelna tura duhsakna a hlan a. Hna an thawhna atana an mamawhte sawipuiin, an mamawh zualpuite chu a ranglama ngaihtuah a nih tur thu a hrih a ni.

Chairperson Pi Justice Marli Vankung, Gauhati High Court Judge hlui chuan phur taka thawh an tum tih Chief Minister hi a hrih a, tun dinhmunah Complaint pathum an dawng tawh a ni. Commission thar a nih avangin thawktuah leh hmanraw lamahte mamawh eng eng emaw an nei a, chungte chu enpui tura a ngen thu a sawi a ni.

Mizoram State Human Rights member te hi Pu Vanlalenmawia, MJS (Rtd.) leh Pu K. Lal Nghinglova, IAS (Rtd.) te an ni a, kumin July ni 29 khan Mizoram Larsap General Vijay Kumar Singh, Retd chuan rinawmna thu tiamtirin a lalut a ni.

<><><>

JJM- SEVA SANKALP ABHIYAN

Sorkar laipuiin rampum huapa thingtlanga chhungkaw tin ten tui connection an neih theihna tura a hmalakna Jal Jeevan Mission (JJM) hnuaiah Mizorama thingtlang khuaah chhungkaw nuai 1 sing 3 & 3060 te hnenah tui connection pek a ni tawh.

Akashvani News Aizawl zawhna chhangin, PHE department-a thawkte chuan JJM hnuaiah hian Mizorama thingtlang khaw hrang hranga chhungkaw 133060 te hnenah tui connection pek tawh a ni a, scheme 852 an neih zinga 849 chu an zo tawh tih a sawi a ni. JJM hmang hian tui test-na laboratory 28 tih changtlun a ni a, heng zinga 4 hi NABL accredited an ni tih sawiin, khaw tinah tui enkawltu Village Water and Sanitation Committee (VWSC) din vek a ni a. District chhunga tui lak enkawl kawnga harsatna lian tham thleng chungchanga hma la turin District Technical Unit (DTU) chu district tinah din a ni tawh a. Heng Rural Water Supply Scheme te enkawlna tur hian O&M policy 2026 notify tawh a. JJM hi kum 2028 thlenga thawh chhunzawm tura pawh sei a ni a. Khaw tina tui supply enkawl naa pui turin Nal Jal Mitra leh Sujalam Shakti (Hmeichhe hona hnuai) ah Skill Training nei tura ruahmanna siam chhoh mek a ni bawk tih an sawi a. Hetihlai hian kum 2024 December thla atang khan Mizoram chuan JJM Fund a hmu tawh lova ni.

Byte PHE

Jal Jeevan Mission (JJM) hi Sorkar laipui flagship program niin, ram chhung hmun hrang hranga thingtlang khuaa chhungkaw tinten tui connection an neih theihna turin kum 2019 August ni 15 khan ram pum huapin hawn a ni.

<><><>

HOME MINISTER @ MZP ASSEMBLY

Home Minister Pu K. Sapdanga’n tunhnaiah College leh High school zirlai zingah ruihhlova inhnamhnawih an awm nual a, Ganja a lar hle bawk tih thu an dawng a ti a, ruihhlo leh mipat hmeichhiatna laka fihlim turin zirlaite a ngen.

Vawiina Mizo Zirlai Pawl Assembly vawi 70-na, Darlawna a hmanpuinaah he thu hi sawiin, Home Minister Pu K. Sapdanga chuan kum 40 kalta vel atang khan Mizoramin ruihhlo a buaipui tawh tih sawiin, tun dinhmunah ruihhlo buaipuitute zingah Aizawl khawpui pawn, sub town leh thingtlang khuaa mi an tam ber a, a dawtah chhungkaw kehchhia tih sawiin, tunhnaiah College leh High school zirlai zingah ruihhlova inhnamhnawih an awm nual a, zirlai zingah Ganja a lar hle bawk an ti a ti a, anmahni an fihlim a nih pawhin an bula mi fihlim lo te bansan tir turin zirlaite chuan mawhphurhna an nei tih a ti a, zirlaipuite zinga ruihhlo do tur chuan, Police, Excise leh YMA aiin zirlaite chu an tha ber tih a sawi a ni.

Home Minister chuan Zirlaite chu UPSC hnuaiah Civil Service an zuam lo a nih pawhin Staff Selection Commission hnuaiah central ministry hnuaia thawh tur hna tha tak tak tam tak exam tur te pe thin turin a ngem a, group B leh C thlengin, under graduate tan pawh thawh tur a tam em em a, ngaihven nachang an hre lem lo a ti a. Mizo thalaite chu mahni state chhungah chauh ni lovin state dang hmasawn zawkte awh nachang hre turin a chah a ni.

MZP Assembly vawi 70-na hi Darlawn, DarkhawpuiRûn-ah nizan atang khan tan a ni a, MZP General Headquarters President Dr. C. Lalremruata chuan Assembly a hawng a, MZP President chuan MZP hre chiang lo leh an Pisa ah pawh vawi khat pawh la lut lo, MZP Dan Bu pawh la chhiar lo leh MZP in ram leh hnam tana a thawh te hre duh miah lo ten nasa taka sawisel a, pawl ding tlak lo hialah chhuah thin mahse, MZP chuan Pawl hmalakna tur reng reng chu ngun takin a ngaihtuah thin a, MZP chuan huanglo an neilo a an pawl thil tum ang zela kalin Committee-in

ram leh hnam, zirlaite tana tha tur ni a angaih-ah chuan hma an la mai thin tiha sawi a ni.

<><><>

MNYF :

MNF thalai chuan Home Minister in a Department chanah thuneihna a la nei a nih ngai chuan Zoram mipuite thlamuanna thuchah neiturin an phut an ti.

MNYF chuan vawiin khan Aizawl Press Club-ah thuthar thehdarhtute kawmin, tunhnaiah Mizoram hmun hrang hrangah ruihhlo a zalenin, tualthahna, rukrukna leh tharum thawhna a thleng zing hle an ti a. Hei hian ZPM kaihhruai Mizoram Sawrkar chuan dan leh thupek kenkawhna kawngah a hlawhchham takzet tih a lantir a, chu chuan dan pawisak lohna leh Dan pal zutna a hring chhuak nasa in, Mizoram chhungah tharum thawh zawnga pawl khawihna a hluar phah an ti a, Mizo mipuite chu mahni ram chhungah ngei an him ta lo niin an sawi a ni.

MNYF chuan Mizorama tualthahna leh chhiatna a thlen fo laia Zoram mipuite thlamuan tura Home Minister thu leh hla hriat tur a awm lo chu an dem takzet tih sawiin Home Minister ngawih reng lai hian Chief Minister chu Home Minister hmakhallh leh lar khalh tum ni awm taka a thu leh hla hmuh tur a tam hle thung an ti a. Home Minister ngawih reng na chhan chu Chief minister in a department chan pahni a chhuhsak tawh a, a tum thumna atan Home Department thleng chhuhsak a tum leh ta em ni tih zawhna an zawt a ni.

Hei bakah hian MNYF chuan Mizoram rorelna sang ber Assembly House ah Chief Minister berin Mizoram Police chungchang mawi lo taka a sawi khân Mizoram Police-te phurna a tihniam nasa hle ah an ngai tih an sawi a, khatianga Mizoram rorelna sang ber Assembly House meuh a thu a chhakchhuak duh kha a mak in Mizoram Police-te hotu lu ber Home Minister chu mahni hna pawh tlin lo leh Minister chak lo tak anga tlâng hriata lantir a duh vang zawk a ni em tih zawhna an zawt bawk a ni.

<><><>

MESL PROTEST:

Kolasib a Mizoram Ex-Servicemen League - MESL chuan vawiin khan Zakaria Lalhriattluanga thlangvawng hauh in Kawng an zawh.

Kawngzawh hi Banglakawn a Circuit House atanga tanin, kalkhawm te hian Sepoy Zakaria-a tualthihna leh rawng taka thah anih demna au puiin, tualthattute chu an dem thu tlang an au pui a. Dan rorelna Court chu na taka hremna lek kawh tur in an phut tih an sawi a ni.

MESL, Kolasib Sub-Hqrs President Hony. Sub. Maj. (Rtd.) Lalenglina chuan thu sawiin, pawl sawi lo kutthlaktute chu an dem takmeuh a, tlangval rual khat in a huhova mi pakhat an sawisak rawn chu a zakthlak in, mualphothlak hle a, rampum huap ang pawhin hnam an ti mualpho ani, a ti.

MESL President chuan, tualthattute chu na taka hrem an phut thu leh hremna kalpui dan chu an enzui zel dawn thu a sawi a, tun hnu ah hetiang hi thleng nawn tawh lose a duh thu a sawi bawk.

Kawngzawh tute hi tualthahna dem in kawng tluan in an au rual a, Diakkawn Bung bul ah au rual leh in, an tin zui ani.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

POSHAN MAAH-HNAHTHIAL

Hnahtthialah Child Development Project Office chuan Rashtriya Poshan Maah, 2026 vawi kua na pualin "Indigenous, Traditional Play & Story Telling Day" chu naupangte tan an buatsaih a. CDPO, Pi F. Lalnuntluangi chuan a hawnna hun kaihruaiin RBSK Medical Officer Dr. John Zonunmawian naupangte thanlenna kawnga hriattur pawimawhte a sawi a ni.

Dr John Zonunmawia chuan naupang nu kalkhawmte hnenah nausen leh naupangten an kum mila hma an sawn leh sawn loh hriat chu thil pawimawh tak a nih thu sawiin Developmental Delay chungchang a sawi a. Developmental Delay chu hriat chhuah a nih lawk loh chuan rilru leh taksa thanlenna kawngah naupang a nghawng theih thu sawiin an puitlin hnu thleng pawhin kawng tam takah an nun a nghawng theih thu a sawi a. Kumin April atanga September thla chhung pawh khan check-up a tihna hmun hrang hrangah Developmental Delay nei naupang thahnem tak a hmuhchhuah hman thu sawiin nu leh pate chuan an fate tan regular taka check-up nei thin turin a chah a ni.

He hunah hian naupangten Mizo thawnthu ngaithlain an tan games chi hrang hrang - Musical Chair, ball pool, rubber zuan, kalchhet inkal siak, inkawibah, inhrupawh leh football te buatsaih a ni a, Games neih zawh hian Poshan Rally neih nghal a ni.

<><><>

PM

Prime Minister Narendra Modia chuan vawiin khan Seva Yatri te nen inkawmin midang rawngbawlsak chu dam chhan ber leh mitin nuna awm tur a ni a ti. Pu Modia chuan Politics ah pawh dinhmun sang berah pawh awm ila mite rawngbawlsak duhna rilru chu kaihruaitu ber a ni tur a ni a ti a.

Vawiina Seva Yatris te hian Prime Minister Modia pianna Vadnagar atanga Varanasi thleng motorcycle in an tlan a. Prime Minister Narendra Modia'n kum 25 chu ram rawngbawl hna a thawh tlin hriatreng nan he hun hi an hmang a ni.

<><><>

BANK

Union Finance Ministry chuan Public Sector Bank leh Regional Rural Bank zawng zawngte chu tun Pathianni September ni 27 ah hian inhawng turin a hriattir. United Forum of Bank Unions (UFBU) ten karleh September ni 28 atanga ni 30 chhung nawrh an tum avangin mipuiten harsatna an tawh loh nan Pathiannia inhawng tur hian a ti a. Reserve Bank of India atangin bank branch, office, ATM-link Branch leh Currency Chest zawng zawngte chu Pathiannia hnathawk tur phalna pek an ni tawh a ti.

<><><>

MUAYTHAI

Mizoram Muaythai Association bultuma R Dengthuama Halla buatsaih North East Regional Muaythai Championship 2026 ah a pumpuia Pakhatna - Mizoram Team an ni a, Pahnihna - Meghalaya Team, leh Pathumna - Tripura Team an ni.

A kharna inkhawm hi Chief Minister Pu Lalduhoma chuan a hmanpui a, Muaythai chu Olympic Sports Discipline la ni chiah lo mah se eizawnna tlak infiamna a ni tawh a, Mizo tlangval Nazareth Lalthazuala pawhin ONE Championship-ah contract tha tawk tak a nei tawh a ti. Hetiang lama infiamna hi Mizote khelchhi tak a ni a, Muaythaiah kher lo pawh contact sports dangah India ram aiawhin thalaite an feh chhuak reng a, lawmman ropui tak tak an rawn hawn thin a. churang chuan, NE fighter te nasa zawkin lo inbuatsaih se. Sum leh pai lakluhna hnarah leh ram leh hnam chawimawi nan lo hmang se a ti.

Adviser to CM Pu Lalmuanpuia Punte pawhin thu sawiin, Muaythai infiamnaah hian Mizoten Foreign-ah medal 16 zet an hlawhchhuak tawh a, thalaite khelchhi tak a ni tih hi a chiang a ti a, hlawhtlinna tam zawk hmuh tumin lo bei zel se, a ti.

He NE Regional Muaythai Championship ah hian India hmarchhak state te an kal kim a, player 350 an fuankhawm a, intihsiakna huang 100 ah inelna an nei a ni.

<><><>